

12. august 2015.

UKA 2015/64

Inatsisartut Suleriaasianni § 36 naapertorlugu apeqquyteqaat aallaavigalugu oqallinnissamik siunnersuut imaattoq matumuuna saqqummiuppara.

Apeqquyteqaat aallaavigalugu oqallinnissamik siunnersuut: Qanoq ililluta ineqarnermut aningaasat immikkoortinneqarsimasut atorluarneqarsinnaaneri qulakkeersinnaavagut?

(Inatsisartunut ilaasortaq, Anthon Frederiksen, Partii Naleraq).

Inuinnaat illuliorniartut pisortatigullu sanaartorneq aamma aningaasarpasuit atorlugit nunatta karsianiit taperserpeqartarput. Aammattaaq aningaasarpasuit aserfallatsaaliinermut kiisalu pisortaniit ikiorsiissutit inimut akiliiniarnermik ajornartorsiutilinnut atorneqartarput. Aningaasat eqqortumik atorpagut?

Akileraartarnermut Atugarissaarnermullu Ataatsimiititaliap nalunaarusiaani marts 2011-imeersumi ilaatigut ineqarnek pillugu imannak allaqqasoqarpoq:

“Inissianut tapiissutit takussaanginerusut amerlangaatsiartut atorneqarput. Tamakku tassaapput inissianut taarsigassasiat erniakitsut akileraartarnikkullu iluaqusiinerit arlallit. Taama tapiissuteqartarneq aningaasanngorlugit ukiumut 300 mio. koruuniupput, taamaalilluni ineqarmut tapiissutinut aningaasartuutit pingasoriaataasa missaat. Tamanna amerlanernut paasiuminaappoq. Paasiuminaalluinnarportaaq 400 mio koruunit taakku ilumut ineqarnermut ajornartorsiutinik iluarsiinissamut sunnuteqartumik ilapittuutaanersut. Nalorninarpoq tapiissutit pisariaqartitsinerusunut tutsinneqartarnersut. Aningaasalersuinikkut tapiissutit akileraarutigullu iluaqutissat ilaqutariinnut isertitaqqortuunut, ineqarnermut akiliutikitsunut imaluunniit namminerisamik inigisamut aningaasartuutikitsunut tutsinneqartarput”.

Oqaluuserisap sammineqartariaqarnera aamma Aningaasaqarnikkut ingerlatsineq pillugu nalunaarut 2015 immikkoortoq 7.5.3-mi qulequtserneqarsimasumi Ineqarnermut tunngasuni aaqqissuusseqqinneq-miit erserpoq, ilaatigut:

“Ineqarnermut periusissiap sivisuumik atorsinnaanissaa pillugu inissialiortiternermi aserfallatsaaliinermilu aningaasartuutit tamarmik aningaasalersorneqassapput.

Ullumikkut taamaanngilaq, aningaasaliissutigisanit iluanaarutit appasipput, Namminersorlutik Oqartussat pitsaasorujussuarmik atugassaqartitsiviusumik

taarsigassarsisitsisarput aserfallatsaaliinnginnerillu inissiat nalinginik annikillisaataarujussuarlutik.

Aningaasartuutit tamarmik taakku tamakkiisumik

aningaasalersugaanngillat namminersortullu inissialiortiternermut aningaasaliitinnissaannut ajornakusoorsaataallutik.

Tamatumunnga peqatigitillugu inissiat sukkavallaamik aserfallattarput”.

Aamma:

“Ineqarnikkut periarfissat oqimaaqatigiinnerulersinniarlugit Naalakkersuisut ineqarnermik ingerlatsinermi suliassaqarfinni ataani allassimasuni tunngavissiorliarput.

- Pisortat namminersortullu inissialiortiternerisa akornanni naapertuuttumik oqimaaqatigiisitsineq.
- Ineqarnermut tunngasunik pitsaanerusumik aaqqissuusineq
- Aserfallatsaaliinermik qularnaarineq
- Anguniagaqarfiusumik iluarsaneq isaterinerlu
- Tapiissutit ineqarnermullu tapiissutit aalajangersimasumut tuttussanngortinneqarneri imminullu pilersornissamat kajumissuseqarnissaq aqputigalugit isumaginnikkut oqimaaqatigiisitsineq.

Suliassaqarfik taanna tamanut tunngasuvoq tassaallunilu nutarteriffigineqartariaqartorujussuaq, aammali ineqarnermi patajaassutsimut tunngatillugu mianersorfiusariaqartoq”.

Taamaamat oqallinnermi isummat assigiinngitsut amerlasuut saqqummersinneqarpata oqallinnermut iluaqutaassasoq isumaqarpunga, Naalakkersuisut suleriaqqinnissaminni isummat assigiinngitsut atorsinnaassamatikkitt.

Inatsisartut oqaaseqaateqarnissaannut siunnersuut:

Inatsisartut Naalakkersuisunut kaammattuutigissavaat Naalakkersuisut suliniuteqaqqullugit nunatta karsianiit ineqarnermut tunngasuni tapiissutit innuttaasunut pisariaqartitsivissortunut illikartinneqarnissaat, inuiaqatigiit akiligaannik pisuut pisuunngoraluttuinnanngissaat qulakkeerniarlugu.